

四庫全書

經部

欽定四庫全書

經部

周禮述註卷十七

詳校官監察御史_臣施朝幹

刑部郎中_臣許兆椿覆勘

總校官進士_臣朱鈐

校對官員外郎_臣張慎和

謄錄監生_臣王家賓

欽定四庫全書

周禮述註卷十七

安溪李光坡撰

夏官司馬第四

鄭目錄云象夏所立之官馬者武也言為武者也夏整齊萬物天子立司馬共掌邦政政可以平諸侯正天下故曰統六師平邦國坡謂司馬主兵而曰馬者軍政莫重於馬也制畿曰萬

乘制國曰千乘制家曰百乘皆以馬率焉

惟王建國辨方正位體國經野設官分職以為民極乃立夏官司馬使帥其屬而掌邦政以佐王平邦國

註曰政正也政所以正不正者也孝經說曰政者正也正德名以行道 呂氏曰夏后氏命胤侯掌六師舉政典以誓衆則邦政之掌於司馬舊矣

政官之屬大司馬卿一人小司馬中大夫二人軍司馬下大夫四人輿司馬上士八人行司馬中士十有六人

旅下士三十有二人府六人史十有六人胥三十有二人徒三百有二十人

註曰興衆也行謂軍行列晉作六軍而有三行取名於此疏曰諸官皆云史十二人胥十二人徒百二十人獨此與諸官異者以大司馬總六軍軍事尚嚴特須監察故胥徒尚多

○凡制軍萬有二千五百人為軍王六軍大國三軍次國二軍小國一軍軍將皆命卿二千有五百人為師師

師皆中大夫五百人為旅旅帥皆下大夫百人為卒卒長皆上士二十五人為兩兩司馬皆中士五人為伍伍皆有長

註曰軍師旅卒兩伍皆衆名也伍一比兩一間卒一旅旅一黨師一州軍一鄉家所出一人將帥長司馬者其師吏也言軍將皆命卿則凡軍帥不特置選於六官六鄉之吏自卿以下德任者使兼官焉鄭司農云王六軍大國三軍次國二軍小國一軍故春秋傳

有大國次國小國又曰成國不過半天子之軍周為
六軍諸侯之大者三軍可也詩大雅常武曰整我六
師以脩我戎大雅文王曰周王于邁六師及之此周
為六軍之見于經也春秋傳曰王使虢公命曲沃伯
以一軍為晉侯此小國一軍之見于傳也百人為卒
二十五人為兩故春秋傳曰廣有一卒卒偏之兩
○一軍則二府六史胥十人徒百人

疏曰此非掌也在軍則置之無則已 長丁又反

司勲上士二人下士四人府二人史四人胥二人徒二十人

註曰故書勲作勳鄭司農云勳讀為勲勲功也此官主功賞故曰掌六鄉賞地之灋以等其功疏曰司馬主征伐軍無賞士不往凡軍以賞為先故司勲列位在前

馬質中士二人府一人史二人賈四人徒八人

註曰質平也主買馬平其大小之賈直疏曰司馬

者主以供軍之用馬質主平馬賈買之故亦列職居前也薛平仲曰賞典所以振士氣故司勲之官不可緩馬材所以謹戎備故馬質之官亦不敢後先王於歲時稽鄉遂之牛馬以辨其可任之物馬之在民固無不足之慮而公馬之備闕不以責乎民而取材於公以給之是以有馬質然馬質宜校人之屬今在此者蓋掌主馬之政而詳及於六馬者校人之官固在所當重量三馬之材惟急於戎馬者馬質之官實

在所當先 賈音古註賈直音嫁下同

量人下士二人府一人史四人徒八人

註曰量猶度也謂以丈尺度地

○小子下士二人史一人徒八人

註曰小子主祭祀之小事 薛平仲曰量人既量地

以集師旅之衆當其將戰所以必其用命者要必有
托以申誓之故大司馬誓羣吏斬牲以左右徇陳誓
者司馬斬其牲者則小子也斬牲者小子共其牲者

則羊人也是以小子羊人次於此焉

○羊人下士二人史一人賈二人徒八人

度待洛反

司燿下士二人徒六人

註曰故書燿為焦杜子春云焦當為燿書亦或為燿
燿為私火立謂燿讀如予若觀火之觀今燕俗名湯
熱為觀則燿火謂熱火與疏曰此職行火之政令
火屬南方故在此也燿音貫焦哉約反觀古喚反

掌固上士二人下士八人府二人史四人胥四人徒四十人

註曰固國所依阻者也國曰固野曰險易曰王公設險以守其國

○司險中士二人下士四人史二人徒四十人

○掌疆中士八人史四人胥十有六徒百有六十人

註曰疆界也

○候人上士六人下士十有二人史六人徒百有二十

人

註曰候候迎賓客之來者 疏曰詩云彼候人兮何
戈與祋亦是武事故在此也 祋丁外反

環人下士六人史二人徒十有二人

黃文叔曰以環名官取巡邏周匝之義 鄭剛中曰
夏官環人掌軍中循環往來無所不察之事而秋官
環人則掌送迎賓客循環往來之事皆以循環往來
為義軍中之環人有戰攻之事則置之非如秋官掌

送迎之職

挈壺氏下士六人史二人徒十有二人

註曰挈讀如挈髮之挈壺盛水器也世主挈壺水以
為漏

射人下大夫二人上士四人下士八人府二人史四人
胥二人徒二十人

○服不氏下士一人徒四人

註曰服不服不服之獸者

○射鳥氏下士一人徒四人

○羅氏下士一人徒八人

註曰能以羅罔搏鳥者郊特牲曰大羅氏天子之掌
鳥獸者

○掌畜下士二人史二人胥二人徒二十人

註曰畜謂斂而養之 射鳥之射食亦反

司士下大夫二人中士六人下士十有二人府二人史
四人胥四人徒四十人

註曰其職掌詔爵詔祿與司馬進賢興功同故在此
○諸子下大夫二人中士四人府二人史二人胥二人
徒二十人

註曰諸子主公卿大夫士之子者或曰庶子

○司右上士二人下士四人府四人史四人胥八人徒
八十人

註曰右謂有勇力之士克王車右 黃文叔曰左主
射右持車故司右與射人聯職

虎賁氏下大夫二人中士十有二人府二人史八人胥八十人虎士八百人

註曰不言徒曰虎士則虎士徒之選有勇力者

○旅賁氏中士二人下士十有六人史二人徒八人

薛平仲曰虎言其有力如虎也旅言其旅力方剛也

○節服氏下士八人徒四人

註曰世為王節所衣服

○方相氏狂夫四人

註曰方相猶言放想可畏怖之貌

大僕下大夫二人小臣上士四人祭僕中士六人御僕下士十有二人府二人史四人胥二人徒二十人

註曰僕侍御於尊者之名大僕其長也疏曰在此者凡言僕御者是武衛之事

○隸僕下士二人府一人史二人胥四人徒四十人

註曰此吏而曰隸以其事褻

弁師下士二人工四人史二人徒四人

註曰弁者古冠之大稱委貌緇布曰冠 弁皮彥反

稱尺證反

司甲下大夫二人中士八人府四人史八人胥八人徒八十人

註曰甲今之鎧也司甲兵戈盾官之長

○司兵中士四人府二人史四人胥二人徒二十人
○司戈盾下士二人府一人史二人徒四人

註曰戈今時句孑戟 句古侯反孑音結

司弓矢下大夫二人中士八人府四人史八人胥八人徒八十人

註曰司弓矢弓弩矢服官之長

○繕人上士二人下士四人府一人史二人胥二人徒二十人

註曰繕之言勦也善也

○橐人中士四人府二人史四人胥二人徒二十人

註曰鄭司農云橐讀為芻橐之橐箭幹謂之橐此官

主弓弩箭矢故謂之橐人 簾音服

戎右中大夫二人上士二人

註曰右者參乘此充戎路之右田獵亦為之右焉

疏曰素巾車玉路居前戎路在後此右在前官又尊者夏官主事尚威武故戎右居前使官尊也

○齊右下大夫二人

註曰克玉路金路之右

○道右上士二人

註曰克象路之右 李子華曰自我右而下止說大夫士而無府史胥徒等人似是臨時取之司右無特置也

大馭中大夫二人

註曰馭之最尊

○戎僕中大夫二人

註曰馭言僕者此亦侍御於車

○齊僕下大夫二人

註曰古者王將朝覲會同必齊所以敬宗廟及神明
○道僕上士十有二人

註曰王朝朝暮夕主御王以與諸臣行先王之道
疏曰朝夕在朝往來駕稅難而且煩故人最多

○田僕上士十有二人

疏曰人亦多者王有四時之田兼有園囿遊獵及取
鮮獸之等亦事煩故也

○馭夫中士二十人下士四十人

疏曰按校人良馬三十六匹一馭夫計良二千一百六十匹則六十馭夫又駕一馭夫主四百三十二匹駕千二百九十六匹則馭夫三人并前六十三人與此不合者蓋此序官脫三人也 朝覲王朝在朝俱直遙反朝暮朝夕俱如字

校人中大夫二人上士四人下士十有六人府四人史八人胥八人徒八十人

註曰校之為言校也主馬者必仍校視之校人馬官

之長 薛平仲曰自戎右至馭夫凡九職掌五路之車自校人至圉人凡七職掌五路之馬先王時國馬足以共軍公馬足以稱賦周制六軍所謂馬牛車輦者皆因歲時以數之若校人而下所謂頒馬者非分頒於民頒之卿大夫之從軍旅也

○趣馬下士阜一人徒四人

註曰趣馬趣養者也鄭司農說以詩曰蹶維趣馬

○巫馬下士二人醫四人府一人史二人賈二人徒二

十人

註曰巫馬知馬祖先牧馬社馬步之神者馬疾若有犯焉則知之是以使與醫同職疏曰有賈者治馬死生須知馬價故有賈人

○牧師下士四人胥四人徒四十人

註曰主牧放馬而養之鄭剛中曰地官有牧人掌牧六牲則馬亦在牧又有牧師者蓋牧人所牧以共祭祀之牲牲非以備駕車之用此牧師正掌牧馬之

地不與牧人之官相通

○庾人下士閑二人史二人徒二十人

註曰庾之言數

○圉師乘一人徒二人圉人良馬匹一人駑馬麗一人

註曰養馬曰圉四馬為乘良善也麗耦也校戶教

反趣清須反阜才早反庾所求反

職方氏中大夫四人下大夫八人中士十有六人府四人史十有六人胥十有六人徒百有六十人

註曰職主也主四方之職貢者職方氏主四方官之
長疏曰在此者司馬主九畿職方制其貢事相成
故在此陳君舉曰職方掌天下之圖而隸司馬者
謹之也戰國策士每言闚周室則可案圖籍以爭天
下故蕭何入秦獨收圖籍以此自漢守之司空寢以
世布當時如江都淮南諸王皆案輿地謀變而王鳳
亦云大史公書有地形阨塞不宜在諸侯王然則古
圖志雖司徒掌之而藏在司馬秘不得見先王所以

弭姦消患者其慮遠哉

○土方氏上士五人下士十人府二人史五人胥五人
徒五十人

註曰土方氏主四方邦國之土地

○懷方氏中士八人府四人史四人胥四人徒四十人

註曰懷來也主來四方之民及其物

○合方氏中士八人府四人史四人胥四人徒四十人

註曰合方氏主合同四方之事

○訓方氏中士四人府四人史四人胥四人徒四十人
註曰訓道也主教道四方之民

○形方氏中士四人府四人史四人胥四人徒四十人
註曰形方氏主制四方邦國之形體

○山師中士二人下士四人府二人史四人胥四人徒
四十人

疏曰案王制云名山大澤不以封故天子立山川之
師以遥掌之使貢故與職方連類在此

○川師中士二人下士四人府二人史四人胥四人徒四十人

○邇師中士四人下士八人府四人史八人胥八人徒八十人

註曰邇地之廣平者 邇音原道音導

匡人中士四人史四人徒八人

註曰匡正也主正諸侯以法則

○譚人中士四人史四人徒八人

註曰彈人主彈序王意以語天下 李泰伯曰天下之情欲上達故訓方氏之職設人主之志欲下通故彈人之職設古者君民一體上下交孚而無壅遏之患如此 彈音探語魚據反

都司馬每都上士八人中士四人下士八人府二人史八人胥八人徒八十人

註曰都王子弟所封及三公采地也司馬主其軍賦疏曰此王自以臣為司馬逸掌都內

○家司馬各使其臣以正於公司馬

註曰家卿大夫采地正猶聽也公司馬國司馬也卿大夫之采地王不特置司馬各自使其家臣為司馬主其地之軍賦往聽政於王之司馬王之司馬其以王命來有事則曰國司馬

周禮述註卷十七

欽定四庫全書

周禮述註卷十八

安溪李光坡撰

○大司馬之職掌建邦國之九灋以佐王平邦國

註曰平成也正也

制畿封國以正邦國

徐氏曰制九服之畿封五等之國則地之大小正

設儀辨位以等邦國

註曰儀謂諸侯及諸臣之儀辨別也別尊卑之位

進賢興功以作邦國

註曰興猶舉也作起也 鄭剛中曰見於德行之謂

賢見於事業之謂功賢可尊也受七命者進為八命
之牧受八命者進為九命之伯功可錄也或加之以
地或進之以律進其賢者則不賢者自殲興其功者
則無功者知奮邦國可作

建牧立監以維邦國

註曰牧州牧也監監一國謂君也維猶連結也

制軍詰禁以糾邦國

註曰詰猶窮治也糾猶正也坡謂制之詰之皆王也軍大國三軍次國二軍小國一軍也禁如葵丘五禁之類鄭剛中曰有軍以馭其亂有禁以詰其違則邦國可糾矣

施貢分職以任邦國

註曰職謂職稅也任猶事也事以其力之所堪

簡稽鄉民以用邦國

註曰簡謂比數之稽猶計也

均守平則以安邦國

註曰諸侯有土地者均之尊者守大卑者守小則灋也疏曰平則者謂五等職貢之等皆有常灋坡

謂上言制畿封國此則均其所守使之有大小之差也上言施貢分職此則平其灋則使之有輕重之等也

比小事大以和邦國

註曰比猶親使大國親小國小國事大國相合和也

坡謂制畿封國分土也大小不同禮亦異數故設
儀辨位以等之位必稱德則人知自奮故進賢興功
以作之德足長人則加命為侯伯故建牧立監牧監
立以維邦國則上下無離心有軍有禁以糾邦國則
上下無悖志而奉上急公可以任之用之矣均守平
則則內得其分比小事大則外通其情而凡任之用

之者皆有常灋天子牧伯無過於取四方小侯無過
於共則安則和也 監古銜反比毗志反

以九伐之灋正邦國

註曰諸侯有違王命則出兵以征伐之所以正之也
諸侯之于國如樹木之有根本是以言伐云

馮弱犯寡則眚之

註曰馮猶乘陵也言不字小而侵侮之眚猶人青瘕
也王霸記曰四面削其地

賊賢害民則伐之

註曰春秋傳曰痛者曰侵精者曰伐又曰有鐘鼓曰伐則伐者兵入其境鳴鐘鼓以往所以聲其罪

暴內陵外則壇之

註曰內謂其國外謂諸侯壇讀如同壇之壇王霸記曰置之空壇之地玄謂置之空壇之地以出其君更立其次賢者疏曰暴內即上云賊賢害民是也陵外即上云馮弱犯寡是也上二文各有其一故伐之

昔之不奪其位此則內外之惡兼有故壇之奪其位
立其次賢

野荒民散則削之

註曰荒蕪也田不治民不附削其地明其不能有

負固不服則侵之

註曰負猶恃也固險可依以固者也不服不事大也
侵之者兵加其竟而已用兵淺者詩曰密人不恭敢
距大邦

賊殺其親則正之

註曰正之者執而治其罪王霸記曰正殺之也春秋
僖二十八年冬晉人執衛侯歸之于京師坐殺其弟
叔武疏曰正者執而治其罪未必即是殺也

放弑其君則殘之

註曰放逐也殘殺也王霸記曰殘滅其為惡坡謂
放如鄭突之出忽弑如楚商臣之弑頤皆放弑其君
而自立者也此經專指諸侯之事而若季氏逐昭雀

杼弑莊之類亦在所殘焉

犯令陵政則杜之

註曰令命也王霸記曰犯令者違命也陵政者輕政
灋不循也杜之者杜塞使不得與鄰國交通 坡謂
用兵侵而不服則伐之伐而不服則圍之上文言侵
伐此言杜意即圍也蓋草制度者為叛叛者君討令
諸侯環之杜塞使不通

外內亂鳥獸行則滅之

註曰王霸記曰悖人倫外內無以異於禽獸不可親
百姓則誅滅去之也曲禮曰夫惟禽獸無禮故父子
聚麀 坡謂九者之序以王灋所加為先後曰肯曰
伐曰壇差重者在先曰殘曰杜曰滅至重者在後曰
削曰侵曰正輕者在中蓋前三者則害及於人次三
者虐止其國至後三者則滅紀灋而窮人欲矣 馮
皮冰反壇音善行下孟反獮音粗竟境同顯於倫反
正月之吉始和布政于邦國都鄙乃縣政象之灋于象

魏使萬民觀政象挾日而斂之

疏曰布政謂上九瀦九伐并下凡令以下皆此時布之
縣音懸

乃以九畿之籍施邦國之政職方千里曰國畿其外方五
百里曰侯畿又其外方五百里曰甸畿又其外方五百
里曰男畿又其外方五百里曰采畿又其外方五百里
曰衛畿又其外方五百里曰蠻畿又其外方五百里曰
夷畿又其外方五百里曰鎮畿又其外方五百里曰藩

畿

註曰畿猶限也自王城以外五千里為界有分限者
九籍其禮差之書也政職所共王政之職謂賦稅也
疏曰侯者侯也為王伺候非常也甸者為王治田
以出賦貢男者任也任王之職事采者采取美物以
共王衛者為王衛守蠻者獯也以近夷狄獯係之以
政教自此以上六服是中國之九州自此已外是夷
狄之諸侯此蠻服出大行人云要服亦一也言要者

亦見要束以文教也夷者以夷狄而得夷稱也鎮者
蓋中國稍遠理須鎮守蕃者以其最遠故得蕃屏之
稱此三服總號蕃服故大行人云九州之外謂之蕃
國世一見指此三服也坡謂此經即施貢分職以
任邦國也下文令賦即簡稽鄉民以用邦國也九瀝
皆經理諸侯之政惟此二事則王所得於諸侯者故
特詳之蕃藩同要於遙反

凡令賦以地與民制之上地食者參之二其民可用者

家三人中地食者半其民可用者二家五人下地食者
參之一其民可用者家二人

註曰賦給軍用者也令邦國之賦亦以地之美惡民
之衆寡為制如六遂矣鄭司農云上地謂肥美田也
食者參之二假令一家有三頃歲種二頃休其一頃
下地食者參之一田薄惡者所休多 疏曰此文承
上邦國之下而云令賦是還據邦國諸侯而說也
坡謂此徵兵邦國之制朱子曰賦兵也古者以田賦

出兵故謂兵為賦或曰孟子云請野九一國中什一
是諸侯亦有鄉遂都鄙也鄉遂都鄙兵制多少不同
而天子調發國兵聚如鄉遂不已悉乎曰凡天子六
軍大國三軍次國二軍小國一軍皆以鄉言之而甸
稍縣都不與焉即天子調兵於侯無過其鄉之軍耳
故九灋云簡稽鄉民以用邦國斯其是也若諸侯有
遍境出灋斯乃非常之變不為令

中春教振旅司馬以旗致民平列陳如戰之陳

註曰以旗者立旗期民於其下也兵者守國之備孔
子曰以不教民戰是謂棄之兵者凶事不可空設因
蒐狩而習之凡師出曰治兵入曰振旅皆習戰也四
時各教民以其一焉春習振旅兵入收衆專於農平
猶正也

○辨鼓鐸鐃鐃之用王執路鼓諸侯執賁鼓軍將執晉
鼓師帥執提旅帥執鼙卒長執鐃兩司馬執鐸公司馬
執鐃

註曰鼓人職曰以路鼓鼓鬼享以賁鼓鼓軍事以晉鼓鼓金奏以金鐃止鼓以金鐸通鼓以金鐃節鼓鄭司農云辨鼓鐸鐃鐃之用謂鉦鐸之屬鐃讀如濁其原之濁鐃讀如謹曉之曉提讀如攝提之提謂馬上鼓有曲木提持鼓立馬髦上者故謂之提杜子春云公司馬謂五人為伍伍之司馬也玄謂王不執賁鼓尚之於諸侯也伍長謂之公司馬者雖卑同其號疏曰此春夏秋冬三時各教其一必春辨鼓鐸者鼓雷

之類象中春雷發聲於外

○以教坐作進退疾徐疏數之節

註曰習戰灋 疏曰按下大閱禮中軍以鞀令鼓已
下有此坐作等之節彼大閱具言於此畧 中音仲
陳直觀反鐻音濁鐻闌平聲賁扶云反數音朔蒐所
留反鉦音征曉女交反

遂以蒐田有司表貉誓民鼓遂圍禁火弊獻禽以祭社

註曰春田為蒐有司大司徒也掌大田役治徒庶之

政令表貉立表而貉祭也誓民誓以犯田廛之罰也
誓曰無干車無自後射立旌遂圍禁旌弊爭禽而不
審者罰以假馬禁者虞衡守禽之厲禁也既誓令鼓
而圍之遂蒐田火弊火止也春田主用火因焚萊除
陳草皆殺而火止獻猶致也屬也田止虞人植旌衆
皆獻其所獲禽焉詩云言私其縱獻肩于公春田主
祭社者土方施生也鄭司農云貉讀為禡禡謂師祭
也書亦或為禡疏曰蒐搜也春時鳥獸字乳搜擇

取不孕任者故以蒐為名誓民即大閱羣吏聽誓于
陳前鼓者即中軍以輦令鼓鼓人三鼓以下 坡謂
穀梁傳曰四時之田皆為宗廟之事是因祭方田也
而因田有祭未見他文焉且此祭社與月令仲春命
民社正同可謂非常祭乎然惟冬夏言享廟而春言
社秋言禘者春為民祈秋為民報重民敬祀互見為
義耳正祭在四孟王制孔疏詳之始終可疑今以經
為正 貉禡竝莫駕反禘音方

中夏教茆舍如振旅之陳羣吏撰車徒讀書契辨號名之用

註曰茆讀如萊沛之沛茆舍草止之也軍有草止之
灋撰讀曰算算車徒謂數擇之也讀書契以簿書校
錄軍實之凡要黃文叔曰號名為夜事今軍夜有
號註以為徽識披之以備死事夫徽識綴於膊上夜
事將何以辨

○帥以門名縣鄙各以其名家以號名鄉以州名野以

邑名百官各象其事以辨軍之夜事

帥謂軍將及師帥旅帥至伍長也以門名者軍將皆
命卿古者軍將蓋為營治於國門魯有東門襄仲宋
有桐門右師皆上卿為軍將者也縣鄙謂公邑大夫
也家謂食采地者之臣也鄉以州名即六鄉也野以
邑名即六遂也百官以其職從王者夜事戒夜守之
事草止者慎於夜於是主別其部職

○其他皆如振旅

王光遠曰若平列陳與夫以教坐作進退疾徐疏數之節皆然 中音仲撰息轉反識音志

遂以苗田如蒐之灋車弊獻禽以享禘

註曰夏田為苗擇取不孕仕者若治苗去不秀實者云車弊驅獸之車止也夏田主用車示所取物希皆殺而車止王制曰天子殺則下大綏諸侯殺則下小綏大夫殺則止佐車佐車止則百姓田獵禘宗廟之夏祭也冬夏田主于祭宗廟者陰陽始起象神之在

內 王光遠曰夏田為苗除禽獸之害而已如蒐之
廬則其它表貉誓民鼓遂圍禁之類皆與蒐同享祔
則所謂以禴夏享先王 祔餘若反

中秋教治兵如振旅之陳

疏曰言教治兵者凡兵出曰治兵入曰振旅春以入
兵為名尚農事秋以出兵為名秋嚴尚威故也

○辨旗物之用王載大常諸侯載旂軍吏載旗師都載
旛鄉遂載物郊野載旐百官載旗各書其事與其號焉

其他皆如振旅

軍吏諸軍帥也師都孤鄉也鄉遂六鄉六遂也郊野公邑之吏也百官大夫士也凡旌旗有軍旅者畫異物無者帛而已書當為畫事也號也皆畫以雲氣

疏曰各書其事與其號者即仲夏百官各象其事及號名之等此秋雖不具辨號名亦畧舉之見四時皆有此物也 中音仲書音畫

遂以獮田如蒐田之灋羅弊致禽以祀枋

註曰秋田為獮獮殺也羅樊網止也秋田主用罔中殺者多也皆殺而罔止祊當為方聲之誤也秋田主祭四方報成萬物詩曰以社以方獮息淺反祊音方中丁丈反

中冬教大閱

註曰春辨鼓鐸夏辨號名秋辨旗物至冬大閱簡軍實凡頒旗物以出軍之旗則如秋以尊卑之常則如冬司常佐司馬時也大閱備軍禮而旌旗不如出軍

之時空辟實 疏曰春辨鼓鐸以下見春夏秋各教
其一至冬大閱之時總教之

○前期羣吏戒衆庶修戰灋

註曰羣吏鄉師以下

○虞人萊所田之野為表百步則一為三表又五十步
為一表田之日司馬建旗于後表之中羣吏以旗物鼓
鐸鐸各帥其民而致質明弊旗誅後至者乃陳車徒
如戰之陳皆坐

註曰鄭司農云虞人萊所田之野芟除其草萊令車得驅馳詩曰田卒汙萊玄謂萊芟除可陳之處後表之中五十步表之中央表所以識正行列也四表積二百五十步左右之廣當容三軍步數未聞致致之司馬質正也樊仆也皆坐當聽誓疏曰月令司徒北面以誓之此經云司馬建旗於後表之中車徒皆坐則此於可陳之中從南頭立表以北頭為後表也○羣吏聽誓于陳前斬牲以左右徇陳曰不用命者斬

之

註曰羣吏諸軍帥也陳前南面向表也月令季秋天
子教于田獵以習五戎司徒搢扑北面以誓之此大
閱禮實正歲之中冬而說季秋之政於周為中冬為
月令者失之矣斬牲者小子也凡誓之大畧甘誓湯
誓之屬是也疏曰羣吏聽誓于陳前者士卒皆於
後表北面坐羣吏諸軍帥皆在士卒前南面立以聽
誓

○中軍以鼙令鼓鼓人皆三鼓司馬振鐸羣吏作旗車徒皆作鼓行鳴鐃車徒皆行及表乃止三鼓撝鐸羣吏獎旗車徒皆坐

註曰中軍中軍之將也天子六軍三三而居一偏羣吏既聽誓各復其部曲中軍之將令鼓鼓以作其士衆之氣也鼓人者中軍之將師帥旅帥也司馬兩司馬也振鐸以作衆作起也既起鼓人擊鼓以行之伍長鳴鐃以節之伍長一曰公司馬及表自後表前至

第二表也三鼓者鼓人也鄭司農云攬讀如弄玄謂如涿鹿之鹿掩上振之為攬攬者止行息氣也司馬遷曰鼓聲不過闐輦聲不過闐鐸聲不過琅疏曰

此經總說聽誓既已將欲向南第二表象戰陳初發面敵此即中春振旅疾徐坐起之事一也中軍者此六軍三軍居一偏皆自有中軍也

○又三鼓振鐸作旗車徒皆作鼓進鳴鐃車驟徒趨及表乃止坐作如初

註曰趨者赴敵尚疾之漸也春秋傳曰先人有奪人之心及表自第二前至第三

○乃鼓車馳徒走及表乃止

註曰及表自第三前至前表

○鼓戒三闕車三發徒三刺

註曰鼓戒戒攻敵鼓壹闕車壹轉徒壹刺三而止象敵服鄭剛中曰凡此萊野立表仆旗聽誓鼓行以至於擊刺如戰之陳皆四時教戰之常灋不於振旅

發舍治兵述之獨詳具於此蓋以明其為大閱故也
○乃鼓退鳴鐃且卻及表乃止坐作如初

註曰鐃所以止鼓軍退卒長鳴鐃以和衆鼓人為止
之也退自前表至後表鼓鐸則同習戰之禮出入一
也異者廢鐃而鳴鐃 疏曰此言乃鼓退者謂至南
表軍吏及士卒回身向北更從南為始也鳴鐃且卻
者此鳴鐃且卻據初至南表退軍之時象在軍軍退
亦鳴鐃 中音仲攬音鹿闕苦穴反辟音避闔吐剛

反間吐獵反

遂以狩田以旌為左右和之門羣吏各帥其車徒以敘
和出左右陳車徒有司平之旗居卒間以分地前後有
屯百步有司巡其前後險野人為主易野車為主

註曰冬田為狩言守取之無所擇也軍門曰和今謂
之壘門立兩旌以為之敘和出用次第出和門也左
右或出而左或出而右有司平之鄉師居門正其出
入之行列也旗軍吏所載分地調其部曲疏數前後

有屯百步車徒異羣相去之數也車徒畢出和門鄉
師又巡其行陳鄭司農云險野人為主人居前易野
車為主車居前疏曰此一經總論教戰訖入防田
獵之事故云遂以狩田也以旌為左右和之門者六
軍分三軍各處東西為左右各為一門旗居卒間者
軍吏各領已之士卒執旗以表之

○既陳乃設驅逆之車有司表貉于陳前

註曰驅驅出禽獸使趨田者也逆逆要不得令走設

此車者田僕也

○中軍以鞀令鼓鼓人皆三鼓羣司馬振鐸車徒皆作
遂鼓行徒銜枚而進大獸公之小禽私之獲者取左耳

註曰羣司馬謂兩司馬也枚如箸銜之有繡結項中
軍灋止語為相疑惑也進行也鄭司農云大獸公之
輸之於公小禽私之以自畀也詩云言私其獫獻肩
于公一歲為獫二歲為羆三歲為特四歲為肩五歲
為慎此明其獻大者於公自取其小者立謂慎讀為

麋爾雅曰豕生三曰豮豕牝曰𦍋麋牡曰麋獲得也
得禽獸者取左耳當以計功

○及所弊鼓皆駢車徒皆譟

註曰鄭司農云及所弊至所弊之處玄謂至所弊之
處田所當於止也天子諸侯蒐狩有常至其常處吏
士鼓譟象攻敵尅勝而喜也疾雷擊鼓曰駢譟謹也
書曰前師乃鼓譟譟亦謂喜也

○徒乃弊致禽饁獸于郊入獻禽以享烝

註曰徒乃獘徒止也冬田主用衆物多衆得取也致禽饁獸于郊聚所獲禽因以祭四方神於郊月令季秋天子既田命主祠祭禽四方是也八又以禽祭宗廟疏曰致禽饁獸于郊者謂因田過郊之神位而饋之坡謂夏冬無外祀故夏惟曰享祫冬惟曰享烝春秋則有二社與祠嘗而外祀惟社有田郊特牲曰惟為社田國人畢作然春秋惟著社方者乃舉外以包內或是親祠嘗而先社如左氏所云后稷親而

先帝耳四時之田皆為宗廟之事鄭豐卷欲祭請田是也既為祭有田然則田在仲月則祭在仲月明矣鄭子入於晏子春秋言正祭在孟月遂以此四祀為因田而祭不攷宗伯甸祝凡田歸僅曰饁獸于郊舍奠于祖廟而無社方禘烝之文乎因傳以改經微少失矣 駮胡楷反譟素報反要於遙反繡戶卦反麋音辰鼓音符

及師大合軍以行禁令以救無辜伐有罪

註曰師所謂王巡守若會同司馬起師合軍以從所以威天下行其政也不言大者未有敵不尚武

○若大師則掌其戒令涖大卜帥執事涖釁主及軍器

註曰大師王出征伐也涖臨也臨大卜卜出兵吉凶也司馬灋曰上下謀是謂參之主謂遷廟之主及社主在軍者也軍器鼓鐸之屬凡師既受甲迎主于廟及社主祝奉以從殺牲以血塗主及軍器皆神之疏曰案小子職云釁邦器及軍器彼官釁之而大

司馬臨之

○及致建大常比軍衆誅後至者

註曰致鄉師致民於司馬比校次之也

○及戰巡陳眊事而賞罰

註曰事謂戰功也

○若師有功則左執律右秉鉞以先愷樂獻于社

註曰功勝也律所以聽軍聲鉞所以為將威也先猶道也兵樂曰愷獻於社獻功於社也司馬灋曰得意

則愷樂愷歌示喜也鄭司農云故城濮之戰春秋傳
曰振旅愷以入于晉

○若師不功則厭而奉主車

註曰鄭司農云厭謂厭冠喪服也軍敗則以喪禮故
秦伯之敗于殽也春秋傳曰秦伯素服郊次鄉師而
哭玄謂厭伏冠也奉猶送也送主歸於廟與社

○王弼勞士庶子則相

註曰師敗王親弼士庶子之死者勞其傷者則相王

之禮庶子卿大夫之子從軍者或謂之庶士 厭於
涉反勞力報反相息亮反從才用反道音導鄉師之
鄉許亮反

大役與慮事屬其植受其要以待攷而賞誅

註曰大役築城邑也鄭司農云國有大役大司馬與
謀慮其事也植謂部曲將吏故宋城春秋傳曰華元
為植巡功屬謂聚會之也要者簿書也攷謂攷校其
功立謂慮事者封人也於有役司馬與之植築城損

也屬賦丈尺與其用人數 與音預註同與其如字
屬音燭植直吏反楨音貞

大會同則帥士庶子而掌其政令

註曰帥師以從王

若大射則合諸侯之六耦

註曰大射王將祭射于射宮以選賢也王射三侯以
諸侯為六耦 疏曰大射是將祭而射故用諸侯為
六耦若賓射射人亦用六耦但不用諸侯當用卿大

夫為之燕射三耦自然用卿大夫已下為之

大祭祀饗食羞牲魚授其祭

註曰牲魚魚牲也祭謂尸賓所以祭也鄭司農云司

馬主進魚牲 食音嗣

大喪平士大夫

註曰平者正其職與其位 疏曰必使司馬為之者

司馬之屬有司士主羣吏今王喪不得使司士故司

馬平之也

喪祭奉詔馬牲

註曰王喪之以馬祭者蓋遣奠也奉猶送也送之至墓告而藏之

○小司馬之職掌

註曰此下字脫滅札爛文闕漢興求之不得遂無識其數者

凡小祭祀會同饗射師田喪紀掌其事如大司馬之灋

○軍司馬

闕

○興司馬闕

○行司馬闕

疏曰軍司馬當下大夫四人興司馬當上士八人行
司馬當中士十六人餘官皆無異稱此獨有之者以
軍事是重故特生別名

○司勲掌六鄉賞地之灋以等其功

註曰賞地賞田也在遠郊之內屬六鄉焉等猶差也
以功大小為差

王功曰勲

註曰輔成王業

國功曰功

註曰保全國家

民功曰庸

註曰灋施於民

事功曰勞

註曰以勞定國

鄭剛中曰事功者或從主事或任

國事或有所營為或有所創制匪勉從之不畏其適我也勞者經營艱苦之意也

治功曰力

註曰制灋成治 鄭剛中曰治功者或平水土或辟草莽或任土地或疏導溝洫力謂其用力以作為也

戰功曰多

註曰剋敵出奇若韓信陳平司馬灋曰上多前虜 鄭剛中曰多者算數過人之義人算其一我算其十

人算其百我算其千出奇無窮人莫能測以多算勝者斯可以為戰功矣 坡謂六者之序自君而民而事也本末偏全各有次第

凡有功者銘書於王之大常祭於大烝司勳詔之

註曰銘之言名也生則書于王旌以識其人與其功也死則於烝先王祭之詔謂告其神以辭也盤庚告其卿大夫曰茲予大享于先王爾祖其從與享之是也今漢祭功臣於廟庭 疏曰詔之謂詔司常書之

又以辭使春官告神 王介甫曰大烝冬之大享當是時百物皆報焉祭有功宜矣

○大功司勲藏其貳

註曰貳猶副也功書藏於天府又副於此者以其主賞 坡謂天府無藏功書之文所謂貳貳司常也盖凡有功者書於大常大功則既書大常司勲又藏其貳也既曰凡有功又曰大功則統而觀之六功相形大小析而言之每功自有輕重矣自王功至此皆等

其功之事 識音志

掌賞地之政令

坡謂政令如下文所云者是也

○凡賞無常輕重眡功

註曰無常者功之大小不可豫

○凡頒賞地參之一食

註曰賞地之稅參分計稅王食其一也二金入於臣

○惟加田無國正

註曰加田既賞之又加賜以田所以厚恩也鄭司農云正謂稅也祿田亦有給公家之賦貢若今時侯國有司農少府錢穀矣獨加賞之田無征耳疏曰加田未知所在或可與賞田同處坡謂自掌賞地至此所謂六鄉賞地之灋也凡有功者皆頒賞地加田則待大功

○馬質掌質馬馬量三物一曰戎馬二曰田馬三曰駕馬皆有物賈

註曰此三馬賈以給官府之使無種也鄭司農云皆有物賈皆有物色及賈直 易彥祥曰物云者國馬之輶深四尺有七寸田馬之輶深四尺駑馬之輶深三尺有三寸其用各有等其材各有宜故皆以三物量之有物則有價故謂之賈

○綱惡馬

註曰綱以縻索維綱狎習之 賈音稼

凡受馬於有司者書其齒毛與其賈馬死則旬之內更

旬之外入馬耳以其物更其外否

註曰鄭司農云更謂償也玄謂旬之內死者償以齒
毛與賈受之日淺養之惡也旬之外死入馬耳償以
毛色不以齒賈任之過其任也其外否者旬之外踰
二十日而死不任用非用者罪 疏曰所受之馬謂
給公家之使 更音庚

馬及行則以任齊其行

註曰識其所載輕重及道里齊其勞逸乃復用之

坡謂及行始駕也此二句或在網惡馬之下蓋同為教馬事也

若有馬訟則聽之

註曰訟謂賣買之言相負

禁原蠶者

註曰原再也天文辰為馬蠶書蠶為龍精月值大火則浴其種是蠶與馬同氣物莫能兩大禁再蠶者為傷馬與坡謂禁原蠶者言牧馬之處與牧馬之人

皆不得再養蠶也

○量人掌建國之灋以分國為九州營國城郭營後宮
量市朝道巷門渠造都邑亦如之

註曰建立也立國有舊灋式若匠人職云分國定天
下之國分也后君也言君容王與諸侯 疏曰量市
朝道巷者若匠人云市朝一夫經塗九軌巷及門渠
亦有尺數若門容二轍三个之等造都邑但與之制
度大小未必身往也 分扶問反

營軍之壘舍量其市朝州涂軍社之所里

註曰軍壁曰壘州一州之衆二千五百人為師每師一處市也朝也州也皆有道以相之軍社社主在軍者里居也疏曰一州則一師每一師各自一處各立市朝各有道以相湊坡謂出軍有社主又有遷廟主此獨言軍社省文也或軍即宗字之誤涂本又作塗

邦國之地與天下之涂數皆書而藏之

註曰書地謂方圓山川之廣狹書涂謂支湊之遠近
凡祭祀饗賓制其從獻脯燔之數量

註曰燔從於獻酒之肉炙也數多少也量長短也

疏曰饗賓獻有脯從若燕行獻賓薦脯醢是也祭禮
獻以燔從故總之言也

掌喪祭奠窆之俎實

註曰窆亦有俎實謂所包遣奠士喪禮下篇曰藏包

筭於旁 窆昌絹反筭所交反

凡宰祭與鬱人受罍厯而皆飲之

註曰言宰祭者冢宰佐王祭亦容攝祭鄭司農云罍讀如嫁娶之嫁罍器名明堂位曰爵殷以罍玄謂罍讀如嘏尸之嘏疏曰厯者謂與鬱人厯皆飲之也

○小子掌祭祀羞羊肆羊殽肉豆

註曰鄭司農云羞進也羊肆體薦全烝也羊殽體解節折也肉豆者切肉也玄謂肆讀為鬻羊鬻者所謂豚解也坡謂周頌我將詩云維羊維牛維天其右

之是祀天亦用羊則此祭祀乃兼指內外神或謂專言宗廟者非是 肆鬻竝他厯反

而掌珥于社稷祈于五祀

坡謂易氏說詳見肆師

○凡沈辜侯禳飾其牲

註曰鄭司農云沈謂祭川爾雅曰祭川曰浮沈辜謂磔牲以祭也月令曰九門磔禳以畢春氣侯禳者侯四時惡氣禳去之也 易彥祥曰飾其牲被之以文

繡謂羊牲也

○釁邦器及軍器

註曰邦器謂禮樂之器及祭器之屬 鄭剛中曰小子掌用羊血以釁也

凡師田斬牲以左右徇陳

註曰示犯誓必殺之 鄭剛中曰不用命者皆狼而不率之人令小子斬羊以示之羊者至狼之物宋義曰狼如羊強不可制者皆斬之此類是也

祭祀贊羞受徹焉

疏曰贊羞若司馬羞魚牲之等則贊之受徹祭畢廢徹之時則受之

○羊人掌羊牲凡祭祀飾羔

註曰羔小羊也詩曰四之日其蚤獻羔祭韭 王介甫曰飾羔若禮所謂飾羔雁者以續也

祭祀割羊牲登其首

註曰登升也升首報陽也升首于室

凡祈珥共其羊牲賓客共其灋羊

註曰灋羊殽饗積膳之羊

○凡沈辜侯禋釁積共其羊牲

註曰積故書為眡鄭司農云眡讀為漬謂釁國器漬軍器也玄謂積積柴裡祀禋燎實柴 眡徐賜反

若牧人無牲則受布于司馬使其賈買牲而共之

○司燿掌行火之政令四時變國火以救時疾

註曰行猶用也變猶易也鄭司農說以鄒子曰春取

榆柳之火夏取橐杏之火季夏取桑柘之火秋取柞
櫟之火冬取槐檀之火

季春出火民咸從之季秋內火民亦如之

註曰火所以用陶冶民隨國而為之鄭人鑄刑書火
星未出而出火後有災鄭司農云以三月本時昏心
星見于辰上使民出火九月本黃昏心星伏在戌上
使民納火故春秋傳曰以出內火 疏曰上經四時
變國火據食火明此春秋據陶冶

○時則施火令

註曰焚菜之時 內音納

凡祭祀則祭燿

註曰報其為明之功禮如祭饗 疏曰祭饗祭老婦

也則此祭燿謂祭先出火之人

凡國失火野焚菜則有刑罰焉

註曰野焚菜民擅放火 疏曰野焚菜有罰者大司

馬中春田獵云火禁則二月後擅放火則有罰也

○掌固掌脩城郭溝池樹渠之固頒其士庶子及其衆庶之守

註曰樹謂枳棘之屬有刺者也衆庶民遮守固者也鄭司農說樹以國語曰城守之木於是乎用之黃

文叔曰士庶子守固與宿衛王宮同其事任霍光曰函谷京師之固武庫精兵所聚故以丞相弟為關都尉子為武庫令漢人猶識此意王龜齡曰宮伯云士庶子之在版者謂守於王宮也此謂頒其士庶子

之守謂守於城郭等處也

○設其飾器

註曰兵甲之屬今城郭門之器亦然 疏曰飾器若城郭門傍所執矛戟皆有幡飾之等是也

○分其財用均其稍食

註曰財用國以財所給守吏之用也稍食祿廩

○任其萬民用其材器

註曰任謂以其任使之也民之材器其所用塹築及

為藩落 塹七豔反

凡守者受灋焉以通守政有移甲與其役財用唯是得通與國有司帥之以贊其不足者

註曰凡守者士庶子及他要害之守吏通守政者兵甲役財難易多少轉移相給也其他非是不得妄離部署國有司掌固也其移之者又與掌固帥致之贊佐也 疏曰甲飾器也變材器言役財者欲見材器是民役之材非財用也

○晝三巡之夜亦如之

註曰巡行也行守者為衆庶之解惰 疏曰此乃掌固設灋與所守之處非是掌固自巡行之也

○夜三鑿以號戒

註曰鑿擊鑿警守鼓也三巡之間又三擊鑿 鑿音戚解佳賣反

若造都邑則治其固與其守灋

註曰都邑亦為城郭

○凡國都之竟有溝樹之固郊亦如之

註曰竟界也 疏曰王國及三等都邑所在境界之上亦為溝樹以為阻固郊謂近郊遠郊

民皆有職焉

註曰職謂守與任 疏曰此亦兼上王國及都合守之處其民皆職任使勞役遞均也

若有山川則因之

註曰山川若穀臯河漢 竟音境

○司險掌九州之圖以周知其山林川澤之阻而達其道路

註曰周猶徧也達道路者山林之阻則開鑿之川澤之阻則橋梁之

設國之五溝五涂而樹之林以為阻固皆有守禁而達其道路

註曰五溝遂溝洫澮川也五涂徑畛涂道路也樹之林作藩落也疏曰此五溝五涂而言樹之林以為

阻固皆有守禁則非遂人田間五溝五涂但溝涂所作隨所須大小而為之皆準約田間五溝五涂其溝上亦皆有道路以相支湊故以五溝五涂而言也國有故則藩塞阻路而止行者以其屬守之唯有節者達之

註曰有故喪災及兵也閉絕要害之道備姦寇也疏曰以其屬守之者謂使司險之下胥徒四十人之屬守其要者其餘使其地之民為守也

○掌疆

闕

○候人各掌其方之道治與其禁令以設候人

註曰道治治道也國語曰候不在竟譏不居其方也
禁令備姦寇也以設候人者選士卒以為之詩云彼
候人兮何戈與祿

○若有方治則帥而致于朝及歸送之于竟

註曰方治其方來治國事者也春秋傳曰晉欒盈過
周王使候人出諸轅轅是其送之疏曰方治謂國

金步曰 卷十八
有事不能自決當決於王國或有國事須報在上皆是也 竟音境何胡我反殺都外反

○環人掌致師

註曰致師者致其必戰之志古者將戰先使勇力之士犯敵焉春秋傳曰楚許伯御樂伯攝叔為右以致晉師許伯曰吾聞致師者御靡旌摩壘而還樂伯曰吾聞致師者左射以蔽代御執轡御下柄馬掉鞅而還攝叔曰吾聞致師者右入壘折馘執俘而還皆行

其所聞而復之

察軍慝

註曰慝陰姦也視軍中有為慝者則執之

環四方之故

坡謂環周迴也軍行慮有伏敵軍舍恐有莫夜之戒
周迴四方詳其有否以為警備今行軍者重此 易
彥祥曰察軍慝則察其在我者環四方之故則環其
在人者

巡邦國搏諜賊

註曰諜賊反間為國賊 疏曰此諜賊即上軍慝之類據邦國故異言之

訟敵國

註曰敵國兵來則往之與訟曲直若齊國佐如師

揚軍旅

註曰為之威武以觀敵

降圍邑

註曰圍邑欲降者受而降之春秋傳曰齊人降鄆

黃文叔曰環人掌致師志於戰也而以降圍邑終焉
不殺之仁也雖然受降如受敵斯亦當察故環人掌
之 謀音牒降戶江反敗側留反柄音兩掉徒弔反
馘古獲反莫音暮間去聲鄆音章

○挈壺氏掌挈壺以令軍井挈轡以令舍挈畚以令糧
註曰鄭司農云挈壺以令軍井謂為軍穿井井成挈
壺縣其上令軍中士衆皆望見知此下有井壺所以

盛欽故以壺表井挈轡以令舍亦縣轡于所當舍止之處使軍中望見知當舍止于此轡所以駕舍故以轡表舍挈畚以令糧亦縣畚于所當稟假之處令軍望見知當稟假于此下也畚所以盛糧之器故以畚表稟軍中人多車騎雜會謹囂號令不能相聞故各以其物為表省煩趨疾于事便也 畚音本縣音懸下同盛音成稟彼錦反

凡軍事縣壺以序聚櫜凡喪縣壺以代哭者皆以水火

守之分以日夜

註曰鄭司農云縣壺以為漏以序聚櫟以次更聚擊櫟備守也玄謂擊櫟兩木相敲行夜時也代亦更也禮未大斂代哭以水守壺者為沃漏也以火守壺者夜則火視刻數也分以日夜者異晝夜漏也漏之箭晝夜共百刻冬夏之間有長短焉大史立成灋有四十八箭

○及冬則以火爨鼎水而沸之而沃之

註曰鄭司農云冬水凍漏不下故以火炊水沸以沃之謂沃漏也 櫟音託敲苦交反

○射人掌國之三公孤卿大夫之位三公北面孤東面卿大夫西面其摯三公執璧孤執皮帛卿執羔大夫鴈

註曰位將射始入見君之位不言士者此與諸侯之賓射士不與也燕禮曰公升即位于席西鄉小臣納卿大夫卿大夫皆入門右北面東上士立于西方東面北上大射亦云則凡朝燕及射臣見于君之禮同

疏曰三公北面者君南面答陽臣北面答君三公
臣中最尊故屈之使北面答君之義孤東面者西方
賓位孤無職而賓客之也卿大夫西面者皆有職故
在東近君居主位也

○諸侯在朝則皆北面詔相其灋

註曰謂諸侯來朝而未歸王與之射於朝者皆北面
從三公位灋其禮儀 疏曰按司几筵云大饗射王
立展前南鄉司服云饗射則驚冕此云王與之射言

在朝當皮弁又何得有展所以然者彼二者據大射在學故有著冕在展之事此賓射在路門之外朝故與彼異也

若有國事則掌其戒令詔相其事

註曰謂王有祭祀之事諸侯當助其薦獻者也戒令告以齊與期

○掌其治達

註曰謂諸侯因與王射及助祭而有所治受而達之

於王王有命又受而下之 坡謂司士職云凡祭祀
掌士之戒令詔相其灋事彼雖掌士而文與此同故
以此國事當祭事也諸侯復逆自大僕掌之故治達
亦專為射祭 齊側皆反

以射灋治射儀王以六耦射三侯三獲三容樂以騶虞
九節五正諸侯以四耦射二侯二獲二容樂以貍首七
節三正孤卿大夫以三耦射一侯一獲一容樂以采蘋
五節二正士以三耦射豻侯一獲一容樂以采蘩五節

二正

註曰射灋王射之禮治射儀謂肄之也鄭司農云容者乏也待獲者所蔽也正所射也詩云終日射侯不出正兮玄謂三侯者五正三正二正之侯也二侯者三正二正之侯也一侯者二正而已此皆與賓射於朝之禮也考工梓人職曰張五采之侯則遠國屬遠國謂諸侯來朝者也五采之侯即五正之侯也正之言正也射者內志正則能中焉畫五正之侯中朱次

白次蒼次黃玄居外三正損玄黃二正去白蒼而畫
以朱綠其外之廣皆居侯中三分之一中二尺大射
禮豸作干讀如宜豸宜獄之豸豸胡犬也士與士射
則以豸皮飾侯下大夫也大夫以上與賓射飾侯以
雲氣用采各如其正九節七節五節者奏樂以為射
節之差言節者容侯道之數也樂記曰明乎其節之
志不失其事則功成而德行立 射三侯食亦反下
及註射侯所射射牲射豕皆同正音征下同豸五旦

反肄餘二反

若王大射則以狸步張三侯

註曰鄭司農云狸步謂一舉足為一步於今為半步
玄謂狸善搏者也行則止而擬度焉其發必獲是以
量侯道灋之也侯道者各以弓為度九節者九十弓
七節者七十弓五節者五十弓弓之下制長六尺大
射禮曰大侯九十參七十干五十是也三侯者司裘
所共虎侯熊侯豹侯也列國之君大射亦張三侯數

與天子同大侯熊侯也參讀為糝糝雜也雜者豹鵠
而麋飾下天子大夫疏曰此射人主賓射兼主大
射之事故為大射張侯也弓之上制六尺六寸中制
六尺三寸下制六尺六尺與步相應搏音博擬度
待洛反餘如字糝素感反干豳同

王射則令去侯立于後以矢行告卒令取矢

註曰鄭司農云射人主令人去侯所而立於後也以
矢行告射人主以矢行高下左右告于王也大射禮

曰大射正立于公後以矢行告于公下曰留上曰揚
左右曰方卒令取矢謂射卒射人令當取矢者使取
矢也玄謂令去侯者命負侯者去侯也鄉射曰司馬
命獲者執旌以負侯疏曰此文承賓射大射之下
則王射射人皆令去侯立於後以矢行告卒令取矢
○祭侯則為位

註曰祭侯獻服不服不以祭侯為位為服不受獻之
位也大射曰服不侯西北三步北面拜受爵

○與大史數射中

註曰射中數射者中侯之算也大射曰司射適階西釋弓去扑襲進由中東立于中南北面視算

○佐司馬治射正

註曰射正射之灋儀也疏曰司馬所主射儀謂若命去侯命取矢乘矢之等皆當佐之

祭祀則贊射牲相孤卿大夫之灋儀

註曰烝嘗之禮有射豕者國語曰禘郊之事天子必

自射其牲今立秋有疆劉云 易彥祥曰方其迎牲
於門則君執紼卿大夫從士執芻至於君親射牲而
孤卿大夫從射焉此射人相孤卿大夫之灋儀以其
掌射灋治射儀故也 疆力朱反

會同朝覲作大夫介凡有爵者

註曰作讀如作止爵之作諸侯來至王使公卿有事焉
則作大夫使之介也有爵者命士以上不使賤者
疏曰會同朝覲王命公卿有事則射人使大夫為上

介使凡有爵者命士以上為衆介也

大師令有爵者乘王之倅車

註曰倅車戎車之副 疏曰王乘戎車副車十二乘
皆從王行則使有爵者命士以上乘之 倅七內反
有大賓客則作卿大夫從

註曰作者選使從王見諸侯 疏曰大賓客不言會
同則是秋冬覲遇并春夏受享在廟之時從王見諸
侯也

○戒大史及大夫介

註曰戒戒其當行者覲禮曰諸公奉篚服加命書于其上升自西階東面大史氏右疏曰此謂王有命使三公命諸侯及衣服就館賜之時則射人戒大史及大夫與諸公為介從才用反

大喪與僕人遷尸作卿大夫掌事比其廬不敬者苛罰之

註曰僕人大僕也僕人與射人俱掌王之朝位也王

崩小斂大斂遷尸于室堂朝之象也檀弓曰扶君卜人師扶右射人師扶左君薨以是舉苛謂詰問之疏曰掌事謂王喪宜各有職掌比其廬如宮正云親者貴者居廬當比其本服親疏及貴賤

○服不氏掌養猛獸而教擾之

註曰猛獸虎豹熊羆之屬擾馴也教習使之馴服王者之教無不服羆比皮反

凡祭祀共猛獸

註曰謂中膳羞者獸人冬獻狼春秋傳曰熊蹯不熟

蹯音煩

賓客之事則抗皮

註曰鄭司農云謂賓客來朝聘布皮帛者服不氏主
舉藏之抗讀為亢其讎之亢玄謂抗者若聘禮曰有
司二人舉皮以東

射則贊張侯以旌居乏而待獲

註曰贊佐也大射禮曰命量人巾車張三侯杜子春

云乏讀為匱乏之乏待獲者所蔽玄謂待獲待射者
中舉旌以獲

○射鳥氏掌射鳥

註曰鳥謂中膳羞者鳧雁鵠鵙之屬 射食亦反鵠
音保鵠于苗反

祭祀以弓矢毆鳥鳧凡賓客會同軍旅亦如之

註曰鳥鳧喜鈔盜便汙人

○射則取矢矢在侯高則以并夾取之

註曰鄭司農云并夾鍼箭具夾讀為甲故司弓矢職
曰大射燕射共弓矢并夾 毆起俱反鈔初教反鍼其
炎反

○羅氏掌羅烏鳥

註曰烏謂居鵲之屬

○蜡則作羅襦

註曰作猶用也鄭司農云襦細密之羅襦讀為縐有
衣袂之襦玄謂蜡建亥之月此時火伏蟄者畢矣豺

既祭獸可以羅網圍取禽也王制曰豺祭獸然後田
又曰昆蟲已蟄可以火田今俗放火張羅其遺教

○中春羅春鳥獻鳩以養國老行羽物

註曰春鳥蟄而始出者若今南郡黃雀之屬是時鷹
化為鳩鳩與春鳥變舊為新宜以養老助生氣行謂
賦賜疏曰此文中春行羽物司裘職云中秋獻良
裘王乃行羽物若然則一年二時行羽物陳及之
曰天子所養之老三國老庶老死政之老是也貴胄

謂之國子則貴而老者謂之國老賤者庶人則賤而老者謂之庶老又有死政者之老焉故羅氏獻鳩以養者國老也司徒以保息養之者庶老也司門以財養之者死政之老也若夫外饗酒正槁人所謂耆老者總三者而言之 中音仲

○掌畜掌養鳥而阜蕃教擾之

註曰阜猶盛也蕃蕃息也鳥之可養使盛大蕃息者謂鵠鷺之屬

祭祀共卵鳥

註曰其卵可薦之鳥

疏曰還謂上經鵠鴈之屬其

雞亦在焉

○歲時貢鳥物

註曰鵠鴈之屬以四時來

疏曰不言鵠鴈雞者所

畜非貢物故以野鳥為貢者也

○共膳獻之鳥

註曰雉及鶉鴒之屬

鴒音如

○司士掌羣臣之版以治其政令歲登下其損益之數辨其年歲與其貴賤周知邦國都家縣鄙之數卿大夫士庶子之數

註曰損益謂用功過黜陟者縣鄙鄉遂之屬版名籍

○以詔王治

註曰告王所當進退

○以德詔爵以功詔祿以能詔事以久奠食

註曰德謂賢者食稍食也賢者既爵乃祿之能者事

成乃食之王制曰司馬辨論官材論進士之賢者以告於王而定其論論定然後官之任官然後爵之位定然後祿之疏曰賢者試功之後其德堪用乃詔王授以正爵有功乃詔王授以正祿也能者先試之以事事成乃定以稍食其能堪用乃後亦授以正爵祿

○惟賜無常

註曰賜多少由王不如祿食有常品 奠音定

正朝儀之位辨其貴賤之等王南鄉三公北面東上孤
東面北上卿大夫西面北上王族故士虎士在路門之
右南面東上大僕大右大僕從者在路門之左南面西
上

註曰此王日視朝事於路門外之位王族故士故為
士晚退留宿衛者未嘗仕雖同族不得在王宮大右
司右也大僕從者小臣祭僕御僕隸僕 疏曰經所
云上者皆據近王為上不據陰陽左右也此王日視

朝之位大僕職路寢庭有燕朝朝士職庫門外有外朝但外朝有諸侯在焉諸侯既在西方右九棘之下孤避之在東方羣臣之位西面其餘三公卿大夫等仍與此位同也

○司士擯

註曰詔王出揖公卿大夫以下朝者

○孤卿特揖大夫以其等旅揖士旁三揖王還揖門左揖門右

註曰特揖一一揖之旅衆也大夫爵同者衆揖之公及孤卿大夫始入門右皆北面東上王揖之乃就位羣士及故士大僕之屬發在其位羣士位東面王西南鄉而揖之三揖者士有上中下王揖之皆逡遁既復位鄭司農云卿大夫士皆君之所揖禮春秋傳所謂三揖在下疏曰上文別三公位此不言三公直言孤卿者舉輕以明重孤卿尚特揖明三公亦特揖可知也易彥祥曰在王門左右者其位皆南向而

在王後故還而揖之

○大僕前

註曰前正王視朝之位

○王入內朝皆退

註曰王入入路門也王入路門內朝朝者皆退反其官府治處也王之外朝則朝士掌焉玉藻曰朝服以日視朝於內朝朝辨色始入君日出而視之退適路寢聽政使人視大夫大夫退然後適小寢謂諸侯也

王日視朝皮弁服其禮則同 鄉音向遁音巡

掌國中之士治凡其戒令

註曰國中城中 疏曰國中之士治者謂朝廷之臣
及六卿之臣皆是所有治功善惡皆掌之以擬黜陟
此一職之士皆臣總號惟有作士適四方使為介是
單士不兼卿大夫又作六軍之士是甲士其餘皆臣
之總號耳

○掌擯士者膳其摯

註曰擯士告見初為士者於王也鄭司農云膳其摯者王食其所執羔雁之摯玄謂膳者入於王之膳人凡祭祀掌士之戒令詔相其灋事

疏曰戒令者齊戒告令也詔相其灋事者謂告語并擯相其行禮之事

○及賜爵呼昭穆而進之

註曰賜爵神惠及下也此所賜王之子姓兄弟祭統曰凡賜爵昭為一穆為一昭與昭齒穆與穆齒凡羣

有司皆以齒此之謂長幼有序 疏曰賜爵者謂祭
末旅酬無算爵之時

○帥其屬而割牲羞俎豆

註曰割牲制體也羞進也 坡謂此割牲羞羞俎豆
文承祭祀之後則據祀事也當在賜爵之前疑或錯
簡

凡會同作士從賓客亦如之

註曰作士從謂可使從於王者

○作士適四方使為介

註曰士使謂自以王命使也介大夫之介也春秋傳曰天王使石尚來歸脤從才用反使色吏反脤上軫反

大喪作士掌事

註曰事謂奠斂之屬

○作六軍之士執披

註曰作謂使之也披柩車行所以披持棺者有紐以

結之謂之戴結披必當棺束於束係紐天子諸侯戴
柩三束大夫士二束喪大記曰君纁披六大夫披四
前纁後玄士二披用纁人君禮文欲其數多圍數兩
旁言六耳其實旁三 疏曰六軍之士即六鄉之民
但天子喪用千人而此云六軍者千人出自六軍故
號六軍之士非謂執披有七萬五千人也

○凡士之有守者令哭無去守

註曰守官不可空也

國有故則致士而頒其守

註曰故非喪則兵災

凡邦國三歲則稽士任而進退其爵祿

註曰任其所掌治 王光遠曰邦國之士皆命於王

其任有勤惰有功過而爵祿有進退者則司士於三歲而稽攷之此黜陟勸沮之灋所以皆本於王朝而國無異政也春秋之時列國之爵位名號皆自己出故孔子譏之

○諸子掌國子之倅掌其戒令與其教治辨其等正其位

註曰故書倅為卒鄭司農云卒讀如物有副倅之倅國子謂諸侯卿大夫士之子也燕義曰古者周天子之官有庶子官與周官諸子職文同玄謂四民之業而士者亦世焉國子者是公卿大夫士之副貳戒令致於大子之事教治脩德學道也位朝位疏曰等謂才藝高下位謂朝天子時依父蔭高下為列倅

七內反大子音泰下同

國有大事則帥國子而致於天子惟所用之

坡謂大事凡大兵大喪當警備非常及王出疆巡守
征伐皆須令宿則帥致於天子惟所調用此所謂守
曰監國也

○若有兵甲之事則授之車甲合其卒伍置其有司以
軍灋治之司馬弗正

註曰軍灋百人為卒五人為伍弗不也國子屬天子

司馬雖有軍事不賦之坡謂此所謂從曰撫軍也
○凡國正弗及

疏曰上文云弗正謂兵賦此云國正謂鄉遂之中所
有甸徒力征之等竝不及也正音征

大祭祀正六牲之體

註曰正謂牝載之 牝音比

凡樂事正舞位授舞器

註曰位侑處 疏曰樂有舞之處皆使正舞人八八

六十四人之位并授其舞之器文舞則羽籥武舞則干鉞黃文叔曰大胥合舞致諸子故諸子於此正舞位授舞器鉞音戚

大喪正羣子之服位會同賓客作羣子從

註曰從於王疏曰位謂在殯宮外內哭位也服者公卿大夫之子為王斬衰與父同

凡國之政事國子存遊倅使之脩德學道春合諸學秋合諸射以攷其藝而進退之

註曰遊倅倅之未仕者學大學也射射宮也王制曰
春秋教以禮樂冬夏教以詩書王太子王子羣后之
太子卿大夫元士之適子國之俊選皆造焉疏曰
凡國之政事謂國內有繇役之事皆是也周禮若言
異代之學則舉其學名即成均瞽宗之類今此直言
學明是周之大學也大學在國中即夏后氏東序在
王宮之左也射射宮即國之小學在西郊則虞庠是
也呂芸閣曰太子君之貳國子之倅諸侯諸臣之

貳也以諸侯諸臣之貳事其君之貳學相同則好相合矣王制謂教以禮樂詩書王太子王子羣后之太子卿大夫元士之適子皆造焉是也事相同則情相信矣國有大事則帥國子而致于太子唯所用之是也故太子雖未為君也君臣之交已盡賢不肖之知已悉可任使之才已備則先王之慮後世者豫矣

○司右掌羣右之政令

註曰羣右戎右齊右道右 李子華曰戎右齊右道

右天子乘車之右皆中大夫下大夫非司右之屬也
司右之右乃兵車之右用以征行侵伐故凡國中之
有勇力者皆屬焉一旦有事則取之以為右 齊側
皆反

凡軍旅會同合其車之卒伍而比其乘屬其右

註曰合比屬謂次第相安習也車亦有卒伍 疏曰

車之卒伍者按宣十二年傳云其君之戎分為二廣
廣有一卒卒偏之兩司馬灋曰二十五乘為偏百二

十五乘為伍

凡國之勇力之士能用五兵者屬焉掌其政令

註曰勇力之士屬焉者選右當於中司馬灋曰弓矢

圍及矛守戈戟助凡五兵長以衛短短以救長

○虎賁氏掌先後王而趨以卒伍

註曰王出將虎賁士居前後雖羣行亦有局分

○軍旅會同亦如之舍則守王閑

註曰舍王出所止宿處閑榷桓

○王在國則守王宮

註曰為周衛

桎薄禮反桓戶故反

國有大故則守王門大喪亦如之

註曰非常之難要在門

疏曰大故謂兵災

○及葬從遣車而哭

註曰遣車王之魂魄所馮依

適四方便則從士大夫

註曰虎士從使者

疏曰天子有下聘諸侯灋大行

人所云歲徧問之等

○若道路不通有徵事則奉書以使於四方

註曰不通達兵寇若泥水奉書徵師役也春秋隱公
公七年冬戎伐凡伯于楚丘以歸

○旅賁氏掌執戈盾夾王車而趨左八人右八人車止
則持輪

註曰夾王車者其下士也下士十有六人中士為之
帥焉

凡祭祀會同賓客則服而趨

註曰服而趨夾王車趨也會同賓客王亦齊服服衾冕則此士之齊服服玄端

喪紀則衰葛執戈盾

註曰葛葛經武士尚輕

軍旅則介而趨

註曰介被甲

○節服氏掌祭祀朝覲衾冕六人維王之大常

註曰服衮冕者從王服也維維之以縷王旌十二旒兩兩以縷綴連旁三人持之禮天子旌曳地鄭司農云維持之○諸侯則四人其服亦如之郊祀衮冕二人執戈送逆尸從車

註曰裘冕者亦從尸服也裘大裘也凡尸服卒者之上服從車從尸車送逆之往來春秋傳曰晉祀夏郊董伯為尸

○方相氏掌蒙熊皮黃金四目玄衣朱裳執戈揚盾帥

百隸而時難以索室毆疫

註曰蒙冒也冒熊皮者以驚毆疫癘之鬼如今魁頭也時難四時作方相氏以難卻凶惡也月令季冬命國難索廋也王氏曰凡陰陽之氣初則為利功成者退留則為歲月令季春國門之儼曰畢春氣恐寒氣留也仲秋天子之儼曰達秋氣恐暑氣伏也季冬大儼辟一歲邪慝之氣也此於大虛間不過氣之宿留者而已留而中于物則為災為疫有鬼物焉居聲

氣之間以主之故儼以毆使蕩而不留 難同儼乃
多反註同毆起俱反魁音欺虔音搜

大喪先匱


註曰葬使之道 疏曰喪所多有凶邪故使之道也
○及墓入壙以戈擊四隅毆方良

註曰壙穿地中也方良罔兩也天子之梓柏黃腸為
裏而表以石焉國語曰木石之怪夔罔兩 鄭剛中
曰葬則用木石木石久而變怪生故始葬則毆之亦

厭勝之術

塏音曠方良上音罔下音兩又竝如字

道音導



周禮述註卷十八